



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 3

Ukraine-i kaketshir aliba tesem amakba tayang kepzüksü: Putin

Totzü jenjang asemen atuba atema opposition-i sorkar aitsür

VOL. XXIII ISSUE NO. 220 (ADOK 220) DIMAPUR AMUNGNÜ (SUNDAY) MONUPII (MAY) 24, 2026

₹ 5.00

MoS Pabitra Margherita-i Dimapur nung appointment letters 129 lema agütsü

Dimapur, May 23, 2026 (TYO): Indian Railways-i Dimapur nung 19 buba Rozgar Mela ayonga agidang Minister of State for External Affairs & Textiles Pabitra Margherita-i appointment letters 129 lema agütsüogo.

Iba sentong nung Margherita-i sorkar department balala nung tasen shimoker nem appointment letters agütsü.

Iba Rozgar Mela ya linük nung tesem 47 nung ayonga agi aser Prime Minister Narendra Modi-i online ajanga lanurtem nem appointment letters 51,000 tema agüja liasü.

"Centre sorkari fast-tracked, transparent, aser merit-based recruitment asoshi nangzükba ama inyaker. Tesüiba nung Rozgar Mela 18 tashi agia arudang appointment letters lakh 11 tema agütsüogo" ta Margherita-isa ashi.

"Dimapur nung mapa tasen angurtem nem tenüngsang agütsür aser nenoki public service asoshi tanü nungi ajemoker. Lanurtemi maneni angazüksü, peii akokba nung tamang akatsü aser linük yangerba nung bendanga agütsütsü ayongzük" ta Margherita-isa ashi.

Prime Minister Narendra Modi lenisüba kübok North

Eastern Region melenshir aser Modi-i "frontier region" nungi "front-runner of growth" melenshitsu mangdang yua lir. Ministry of Development of North Eastern Region (MDoNER) ajanga connectivity, infrastructure aser employment nung senotsü aika endoker aser kanga renlokogo ta MoS Margherita-isa metetdaksü.

Nagaland aser North East nung railway infrastructure kanga renlokogo aser 2009-14 atema Rs 2,122 crore aliba nungi 2026-27 atema Rs 11,486 crore kuma annual railway budget punguben agi teimba kumogo ta paisa shisem.

Nagaland nung küm 119 lir sülen ang Shokhuvi nung railway station tanabuba lapok aser iba ajanga regional connectivity akangshiogo ta paisa ashi.

"Indian Railways-i parnok network 99.2% tashi electrified süogo aser Mission 100% Electrification atema maneni inyakdar. Tanü mapa tasen nung shimokertemi Viksit Bharat @2047 mangdang nung shilem agirtem asütsü ayongzük" kechiyong linük yangerba nung India nung lanurtem ya tongti shilem agirtem lir" ta MoS Margherita-isa metetdaksü.

Marco Rubio-i PM Modi den ajurutep

New Delhi, May 23, 2026 (Agencies): United States Secretary Marco Rubio-i Honibarnü New Delhi nung Prime Minister Narendra Modi den ajurutep aser President Donald Trump tenüng nung PM Modi dang White House semdangsu atema jaok.

Tanü PM Modi aser Rubio nati security, trade, aser critical technologies nung U.S.-India amalitepa aotsü aser free & open Indo-Pacific atema linük anaprong tashi aitsü indang lemsatepa liasü.

"US Secretary of State, Marco Rubio pelashishia agizük. Künati India-US Comprehensive Global Strategic Partnership renloka aoba aser regional, global peace aser security dak sendakba onüktem lemsatepogo. Alima ajungtsü atema India aser United States maneni inyaksangshia aotsü" ta PM Narendra Modi-i X nung metetdaksü.

Marco Rubio-i tanü "America First" visa scheduling tool sayago aser iba ya American

consulates inyaksangshi ajungketsü atema lir.

Iba visa ajanga United States den rongsenketzung aser tongti tesentaktem akangshiba business professionals aser nübortem nem temulung agütsür ta Rubio-i ashi.

US-India tesentaktem ya akangakanger aser linük ana tsüngda investments nung 20 billion tema süogo ta pai ashi.

"Indian company temi United States nung 20 billion tashi investments süogo" ta pai ashi.

Rubio den pa kinungtsü Jeanette D Rubio nati Kolkata semdangba sülen tanü New Delhi tonga aru. Rubio-i anogo pezünü atema India semdang aser pai yimti balala sema senzüba den May 26 nü New Delhi nung Quad foreign ministers' senden nung adentsü.

Tanep Kolkata atongba sülen Rubio, pa kinungtsü Jeanette aser US Ambassador to India, Sergio Gor nungeri Missionaries of Charity indang headquarters Mother House semdanga liasü.

Kaketshir 13 nem NI Jamir Academic Excellence Award agütsü



Kohima, May 23, 2026 (TYO): Molu Ki, Kohima nung 20 buba NI Jamir Academic Excellence Award agütsüba sentong ayonga agiogo.

Taküm iba sentong nung Aor rongnungi HSLC toppers 13 nem sempet agütsü.

Iba sempet ya Kohima Ongpangkong Telongjem (KOT) ajanga agütsür aser takok anguba kaketshir shia nem kulikaket ka aser Rs 10,000 sempet agütsü.

May 23, 2026 nü Labour and Employment, Skill Development and Entrepreneurship and Excise Advisor Moatoshi Longkumer-i kaketshir 13 nem NI Jamir Academic Excellence Award agütsü.

Tajungtiba takok anguba ya

odang anguba masü saka bendanga agütsüba, merangba aser tasü aitba ajanga angur. Anungji HSLC toppers 13 nem tenüngsang tulu agütsür ta Advisor Moatoshi-i ashi.

"Tanü kanga dang kara melenshiba alima ka nung shisatsü ya khen nung prokshir, artificial intelligence (AI) ajanga industry tem melenshir aser technology ajanga rongsenketzung jenjang yanglushir. Tanü maongkatem aika kumogo aser iba amaji nisungtem anisaba aser tetoktepa aika kumogo" ta pai ashi.

"Kaket shisaliok nung tajungtiba asüba yagi meperir anungji kaketshirtemi ochishiba, akangkanga noktakba, taochi

sayuba, tashi angaba aser tangar akhümtsübuba jaklaliro benshitsu" ta Advisor Moatoshi-isa ayongzük.

Shisaliok ajanga nenok tera nungi mepilatsüla saka loktiliba aser nübortem tajungba tenzüksü merangtsüla ta paisa kaketshirtem dang ashi.

NI Jamir taküm ajanga tashi angaba, public tenzükba aser shisaliok o tejakleni aotsü asoshi bendanga agüja inyakba asenok dang sayur ta Moatoshi-isa shisem.

Iba sentong nung KABA Pastor, Temjenmongba Sempo-i toppers asoshi sarasademtsü aser NI J Trust Board of Governors züngsem Supongliba-i sempet agütsüba mapang ketdangsüa agi.

Naga yimdaklir 6 pur aoba ken o NIA nem agütsütsü: Manipur CM

Imphal, May 23, 2026 (Agencies): United Naga Council (UNC) teshimtet telok kati Manipur Chief Minister Yumnam Khemchand Singh den ajurutepogo.

UNC teshimtet teloki sorkar dang Kangpokpi district kübok Konsakhul village nungi pur aoba Naga yimdaklir trok bushitsü ayongzük.

Idangji Chief Minister Khemchand-i yimdaklir trok pur

aoba ken o ya National Investigation Agency (NIA) nem bushisüngdang südaksütsü ta ashi.

May 13 nü Kangpokpi district nung arogo lennir asem tepsetba ken o ya NIA nem agütsüogo ta paisa ashi.

May 14 nungi samaba yimdaklirtem search & rescue operations tenzuka liasü ta Khemchand-isa shisem.

Paisa UNC dang Kuki civilians

14 tashi pua aliba chiochtsüba maparen nung yaruiteptsü mepishi.

CM Khemchand-isa Kuki nunger dang Naga yimdaklirtem bushitetsü asoshi yariteptsü ayongzük.

Chief Minister-isa Manipur nung kin ajak dang sorkari tensa süngjemsü aser yimjung bener arutsü asoshi inyakba mapa nung yariteptsü mepishia metetdaksüogo.

7 buba Yajen Aier konang tetushi & AKTM Excellency Award agütsü



Mokokchung, 23 May (TYO): Asetkong Mungdang-i ayongzuka 7 buba Yajen Aier Konang Tetushi aser AKTM Excellency Award agütsüba sentong 23rd May, 2026 nü Süngratsü Senden Salang nung meraketa agiogo.

Taküm AKTM Excellency Award agizükjerji HSSLC nung - Mopungchuket nunger Tirmen Jamir, (Little Star Higher Secondary School, Dimapur nungi Science Stream nung Top 3), aser Mopungchuket nungersa Ungnir L. Kichu (Lima Aier

Higher Secondary School, Dimapur nungi Science Stream nung Top 8) na liasü, aser HSLC nung Süngratsü tsür Retina Jamir, (Little Flower Higher Secondary School, Kohima nungi Top 16) liasü. Konang agizükjer ajak nem sempet sen den kulikaket agütsüogo.

Tzükung nung aliba school-tem nungi kaketshir rongnung tajungtiba takok nguteter nem Yajen Aier konang tetushi agütsü aser taküm iba sempetji - Limaonger (GHS Longjang nungi Class 10 nung 73.33% nung

takok angü), Aosanen (Clark Memorial Higher Secondary School, Impur, nungi Class 9 nung 64.5% nung takok angü), aser Sashimongla I. Longkumer (GHS, Longjang, nungi Class 8 nung 98.71% nung takok angü) par asem liasü.

Sentong nung EAC Kobulong Obangnener Jamir, Asetkong Mungdang Tatong Tir Limaaküm Jamir, aser Süngratsü Village Council Chairman S. Bendang Aier parnoki tepela o den tayongzükba o tulu bener arua sentepa alirtem ayongzuka liasü.

ATI-i government school tesayur atema training ayongzük



ATI-i government school tesayur atema training ayongzük agiba sentong nung tangokba noksa angur. (Kohima, May 23, 2026)

Dimapur, Monupii/May 23 (TYO): Administrative Training Institute (ATI), Government of Nagaland, Kohima ajanga Kohima District nung aliba Government school tesayurtem asoshi anogo ana "Awareness on Child Mental Health" training sentong May 21-22, 2026 anogotem ATI, Kohima nung ayongzükä liasü.

School-i aoba tanurtem mental health tebilemstü jangjatetsü, angatetsü aser lenmang sayutsü atema shisatsü, yimya aser tasa agütsü nükjilding nung iba sentong ya ayongzükä liasü.

Tanurtem tekolok shisatsü junga anitetsü aser kaket reju telungzük nung keraa jangjateta nungdakba mera agitsü asoshi iba training yagi sayur.

Iba training nung 'Mental health and common mental disorders', 'Childhood mental health disorders', 'Psychological First Aid (PFA)', 'Core counselling skills for teachers', 'Mental and emotional well-being of teachers', 'Counselling skills practice and application', 'Child Helpline 1098', 'Vulnerable children' aser 'Child mental health issues in Nagaland' onüktem ayimjema liasü.

Training nung shisalen sayurtem Veronica Nriame, Psychiatric Social Worker, District Mental Health Programme (DMHP), NHAK; Ketuosenu Phewhuo, Clinical Psychologist aser Neingutounuo Kulnu, Helpline Administrator, Child Helpline 1098, WCD Control Room,

Nagaland nungertem liasü.

Training nung sensaksemba mapang Director General, ATI and Additional Chief Secretary (Agriculture) & Agricultural Production Commissioner, V. Shashank Shekhar, IAS ajanga school tanurtem mental health tebilemstü tali akumba aser tesayurtemi item tebilemstü koktettsü asoshi inyakba mapang timtem ajurubatem indang lemsatepa liasü.

Director General-i modern education den sobaliba aser yimya-koya meyoktepba ajanga tanur mental health tebilemstü koktetba tsütsü teyari tulu alitsü ta ashi.

Iba training nung Kohima District nung aliba government school 16 nungi tesayur 36 dena liasü.

Sainik School Punglwa nung annual investiture ceremony ayongzük

Dimapur, Monupii/May 23 (TYO): Sainik School Punglwa ajanga Honibarnü annual investiture ceremony ayongzükä cadets 42 nem maparen balala nunglokja liasü.

Iba sentong nungya temsüa aliba aser temulung lemtetba cadets nem pei reju tenzüksü asoshi maongka aser teinyaktsü mapa agütsür. Iba sentong nung School Principal, Col. Dr. Smita Misra aden.

Sentong mapang cadets 42 nem lenir mapa balala nungloksü, kong school-level

nung shimba 14, school indang houses 10 asoshi house appointments 28 liasü.

Iba mapang Langpai L ya school cadet captain shim aser Dzuzuto ya school adjutant shima liasü. Pranav ya school indang academic captain shim, Aditya Kumar school discipline captain aser Esu Lajemei ya school sports captain shima liasü.

Maneni tetsür cadets atema captain Angela Rimi Pura shim aser vice-captain Laishram Daina Devi shima liasü.

Iba anogomung nungtem nung Principal Col. Dr. Smita Misra-i school indang küm nung anaben adokba cadet newsletter "VYWOM" (Voice of the Young Warriors of Morung) sayatsü.

Col. Dr. Misra-i iba sentong nung jembidang kaketshir lenir tasentem nung mapa nungloksüba indang rateta ashi aser parnoki nangzükba ama inyaktsü ayongzükä liasü.

Lai cadets tem dang lesson azüngba nung mapang peria indoktsü nenshia ashi.

Lotha nunger HSLC & HSSLC takok angurtem tushia amshi

Dimapur, Monupii/May 23 (TYO): Lotha Students' Union ajanga Lotha Officers' Association (LOA) den teka amteper Lotha nunger HSLC aser HSSLC tatidang nung takok angur nem tenüngsang aser tetushi agütsüba sentong ka Wokha nung ayongzükä liasü. Sentong akhumdong Zubemo Lotha Tsanglao, additional director, Department of Employment, Skill Development and Entrepreneurship ajanga kaketshir temi takok tajung ngutetba asoshi pelaba lemsatep aser tesayur aser tsürabor temi anibelem mesasai pei tanurtem dang lenmang sayua nüburttem dangi konang bener arutsüba asoshi tetushi agüja liasü.

Tsanglao-i kaketshirtem dang iba takok ya tetenzükter ang lir aser education ya marks tajung anguba kisung masü saka skills, yimya aser temulung

lemtetba dena lir ta ashi. LOA tir Orenthung Lotha-i kaketshirtem dang pei careers kanga shisa kaa shimtsü ayongzükä liasü.

Iba sentong nung HSLC toppers ter aser HSSLC toppers pongu den HSLC aser HSSCL nungi MIL nung Governor's Awardees ana aser Government Higher Secondary School (GHSS) Wokha nungi Governor's Award angur nem LSU aser LOA ajanga kulizüng kaket tem agüja liasü.

Lt. Thungjano Tsanglao Honorary Award for Lotha female achievers sempet ya HSLC rank holders (Rank 6) ana nem kinunger tenüng nung Lankonsen Tsanglao, ADC Tamlu ajanga agüja liasü.

Iba den ano Wokha district nung noklang shilem takok anguba schools tem nema tepela temaittsü kulizüng kaket agüja liasü.

Assam Rifles-i Indo-Myanmar arütsülen yoga ayongzük



Dimapur, Monupii/May 23 (TYO): 12 buba International Day of Yoga 2026 asoshi 100 Days Countdown Campaign kübok Assam Rifles, Jairampur Battalion ajanga May 22, 2026 nü Indo-Myanmar arütsü nung aliba POB Pangsau Pass nung yoga session ka ayongzükä liasü.

Meta talang nung aliba sepaitem tekolok aser temulungsentsü süngjema alitsü aser temang anema alitsü asoshi inyakba nung shilem ka ama iba sentong ya ayongzük. Tensa tamajung agi

meketbanger aser linük indang arütsü wazükä ayuba mapang süaka sepaitemi iba yoga session nung tejangraba tulu nung shilem agia liasü.

Iba session ya Pangsau Pass tejakdang agia taküm yoga day omen "Yoga for Wellness, Wisdom and World Peace" indang tanüla tali jangja sayua liasü.

Iba sentong ya ajanga Assam Rifles temi security personnel rongnung telungjem adokdakttsü, yimya tajung amshidakja tali tashi itshitsü asoshi inyakba sayur.



May 23, 2026 nü Dimapur nung Dimapur Chümoukedima & Niuland Akhoyatsür Telungjemi ayongzükba " Skill Training Program" nung adenertem noksa nung angur . Iba sentong nung shi. mersü aser lasüng agi tsumar lon, (pickle) yangluba, anshi amtsük, chicken roll , rice nuggets, chisüng agi rice pokora aser Sandwich chiyongtsütem yangluba yimya aser tasatem sayua liasü. Iba sentong nung tesayur Wt. Amenla Longkumer liasü. Iba ama sentong ajanga tangazükertemi pei nungdak asoshi dang masü saka tayoktsü dena yangluteta aotsü imlar .

Shamator DC Chubatemjen den tepila sentong agi

Dimapur, Monupii/May 23 (TYO): Shamator indang Deputy Commissioner mapa yutsüsang Chubatemjen den tepila sentong ka Deputy Commissioner indang Conference Hall nung May 22, 2026 nü agia liasü.

Iba sentong nung outgoing DC ajanga jembidang Shamator nung aliba heads of departments (HoDs), civil society organizations aser nüburttemi pa kümsük mapang amalitep akaba atema pelaba lemsatep aser parnoki yaritepba ajanga pa indang office nung timtem makai inyaktetogo ta ashi.

Pai HoDs ajanga dang pei mapa nung tali bendanga agütsütsü ajungshi aser Shamator ya state nung districts tasentem rongnung ka

asünungji, lenla ajaklen terenlok asoshi temulung tali agüja anepalutsü nungdaker, ta ashi.

Yimkihung Tribal Council tenüng nung Hankiu-i jembidang, administration ketdang asütsü atema teti station nung aliba aser nüburttemi atema outgoing DC dang pelaba lemsatepa liasü.

Talisa jila lenmang yanglushiba nung yaritepba atema pelaba lemsatep aser tarutsü wadang asoshi moaja liasü.

District administration tenüng nung Athrong Yimchunger, SDO Hq ajanga jembidang, pa ajak den lirumedema litetba asoshi tenüngsang agütsü aser nüburttemi mapa inyakba mapang pai lenmang sayubatem bilemtetsü ta ashi.



Kolkata, May 23, 2026: Honibarnü US Ambassador to India, Sergio Gor aser US Secretary of State, Marco Rubio nati Kolkata nung Missionaries of Charity indang headquarters, Mother House semdangba mapang tangokba noksa nung angur.

Totzü jenjang asemen atuba atema opposition-i sorkar aitsür

New Delhi, Monupii/May 23 (Agencies): Tesüiba anogo ti tsüingda tang agi tasemenbuba petrol aser diesel jenjang atuba sülen opposition party temi sorkar sashia aitsüogo.

Congress Tir, Mallikarjun Kharge-i, tanga linüktemi pei nüburttem nem anisüngzük agütsüdang BJP sorkaribo pei nüburttem dang nungi maneni auyar, ta aitsü.

Kharge-i X ajanga, "Tang Petrol jenjang sen 100 adenogo, tangbo nüburttemi aazükba nungi shilem lemsar auyar! Petrol-diesel nung anogo shia central saru sen crore 1,000 agiba sülena a BJP melung masür. International jenjang ajema aliba mapang nung iba tajanzükji nüburttem nem magütsü, ajisüaka maneni auyar," ta metetdaksü.

"Anogo 8 tsüingda parnoki petrol-diesel jenjang asemen tuogo. Bendang linüktem den medemdangra India nung jenjang tajemba, ta asenok nem metetdakja liasü. West Asia nung rara tenzükba mapang Ato

kilonser Modi-i India nungertem dang ajak junga lir ta ashi, iba mapang nungji tanga linüktemibo pei sensotem nem anisüngzük agüja liasü," ta pai ashi.

Paisa, Australia nungbo excise duty ajema sensotem atema petrol litre shia sen 17 ajema kümtsüogo, Germany-ia saru ajema totzü jenjang litre nung sen 17-19 ajemtsüogo aser UK nunga totzü saru ajemtsüogo, ta metetdaksü.

"Narendra Modi, onok nem telanzüba agüjang- shilem lemsar auyaba nungi shirnoksa tajanzük angur?" ta Kharge-i asüingdang.

Trinamool nungi Rajya Sabha MP, Sagarika Ghose-i X ajanga, "Hopta ka tsüingda tang agi tasemenbuba totzü jenjang atur. Election sülen nüburttem maneni timtemer," ta ashi.

TMC-i official X handle ajanga, "Anogo 10 tsüingda tang agi tasemenbuba Petrol aser diesel jenjang tuogo! Jenjang atuba ajanga nüburttem timtemba mapang BJP sorkari

maneni totzü jenjang atuba ajanga sensotem nem khuret tali bendenloksür. Jenjang atuba shia kibongtem nung budget raksatsür, transport aser nüngdakba osettsüsettem nung jenjang atur. Middle class purtem aser sensakertem kobika timtemtsü?" ta asüingdang.

Punjab nung finance minister aser AAP lenir Harpal Singh Cheema-i, India nung foreign policy tamakok nguogo, ta aitsü.

Cheema-i, "Tesüiba anogo ter tsüingda diesel aser petrol nung sen 5 tali tuogo. Commercial gas jenjang atubaji nüburttem ajaki meteta lir. Linük nung sensakertem timtemer aser Ato kilonser bendangleni aoba manener. Linük foreign policy tamakok nguogo," ta ashi.

Tang tesüsa petrol litre shia poisa 87 aser diesel litre shia poisa 91 tuogo.

May 15 nü Petrol aser diesel litre shia sen 3 atu aser May 19 nü petrol aser diesel litre shia poisa 90 tua liasü.

Telangana kübok district tenet nung tatsük agi nisung 16 asü

New Delhi, May 23 (Agencies): Telangana state nung tali atsükba agi nisung 16 süogo; Honibarnü state Revenue Minister Ponguleti Srinivas Reddy-i iba osang metetdaksü.

State sorkari takoksa angur kibongtem shia nem sen lakh pezüzü teyari agütsütsü atema telemtetba agiogo.

Jayashankar Bhupalpally nung nisung pezü asü, Warangal

Urban nung nisung asem, Karimnagar nung nisung asem, Nizamabad nunga nisung asem, Jogulamba Gadwal nung nisung ka, Ranga Reddy nunga ka aser Suryapet nunga ka asü.

Telangana nung temperature tutep atuba nung ajemdaker Honibar nikongdang health ketdangsertemi 'Red alert' sangdongogo.

IMD aser state state health department-i nüburttem dang

tsüingsang-mopung ano tamajungba dang akümtsü, anungji ajak kümdanga alitsüla, ta tetuyuba agütsüogo.

Ketdangsertemi nüburttem dang anüingdang 12:00 ako nungi nikongdang 4:00 ako tsüingda kimai mayazüksü metetdaksüba den külemi tzü, ORS mesüra temang nung tzü peria alitsüsa tajemtsü tapu balala ajemtsü metetdaksü.

July ita nungi Bengal nung Ayushman Bharat cards agütsütsü

Kolkata, May 23 (Agencies): Honibarnü West Bengal Chief Minister Suwendu Adhikari-i, July ita nungi tenzuka state nung Ayushman Bharat health cards lema agütsütsü, ta metetdaksü.

Tesüiba küm tenet jungnüa state nung Centre sorkar indang health insurance scheme ya mebenoki liasü, kechiyong taoba mapang Chief Minister Mamata Banerjee-i aniba sorkari iba scheme anena liasü.

Adhikari aser Union Health Minister JP Nadda na video conferencing ajanga senden amenba sülen Adhikari-i iba osang ya metetdaksü.

Chief Minitser-isa, tang state nung beneficiaries crore 6 aliba Swasthya Sathi scheme ya-a Ayushman Bharat scheme kübok aiddaksütsü, aser ibaji ajanga West Bengal nung alirtem dang masü saka state nungi linük tesem balalai oa alirtem-a tajanzük angutsü, ta ashi.

Ayushman Bharat scheme ya 2018 küm September ita nung West Bengal nung benoka liasü, ajisüaka 2019 küm January 10 nü Trinamool Congress sorkari iba scheme anenadok.

Adhikari-i, Centre sorkari Bengal nung Ayushman Bharat kübok küm ana atema sen crore 976 lemsükja liasü saka taoba sorkari magizük, ta metetdaksü.

Chief Minister-isa, West Bengal nung TB tashidak meshimeshia samatsütsü atema campaign ka tenzüksü, ta metetdaksü.

West Bengal nung healthcare atema Pradhan Mantri Jan Aushadhi Kendras 468 amenoktsü asoshi Centre sorkar nem temepishiba ka agütsüogo; item medical stores nung jenjang dalang agi mozü agütsütsü.

Iba dak alia arrshi küm 5 ser tekübokpurtem kanga asüba district tenet nung tanurtem healthcare atema inyaksü aser iba atemaji taruba ita asem tsüingda doctor tem, nurse tem aser health personnels shimtsü, ta metetdaksü.

National Health Mission kübok West Bengal nem sen crore 2,103 lemsüktsüogo aser iba nungjagi sen crore 500 bo agütsüogo, ta Adhikari-i metetdaksü.

Tawa assembly election atema nüboyimba mapang BJP-i, Mamata Banerjee-i state nung Ayushman Bharat scheme densema Central schemes nokdang, saka BJP sorkar arura item scheme ajak benoktsü, ta nanzüka liasü.

Bengal assembly election nung BJP-i menden 208 tashi nung takok ngua Trinamool Congress sorkar atsüingdokogo. TMC-i menden 80 dang nguteta liasü.

Rozgar Mela kübok nisung 51,000 nem mapa nung shimba shidi agütsü



May 23, 2026 nü Jammu yimti nung 19buba Rozgar Mela kübok sorkar department balala nung mapa angurtemi 'appointment letters' amer tangokba noksa nung angur.

New Delhi, May 23 (Agencies): May 23 anogo nung 19buba Rozgar Mela kübok Ato kilonser Narendra Modi-i nisung 51,000 mapa nung shimba 'appointment letters' agütsüogo.

Ato kilonser Modi-i, "Tanü lanur 51,000 nem sorkar mapa nung shimba shidi agütsüogo aser nenok ajak 'Vikas Yatra' nung partners asütsü. Taruba kümtem nung Terenlok India ataloktsü atema nenoki tongtibang shilem agütsü," ta metetdaksü.

Taoba mapang Rozgar Mela 18 nung nisung lakh 12 dak tema nem mapa nung shimba shidi agüja liasü.


Lanur 51,000 ji India sorkar Ministries aser Department balala nung inyaksü; iba nungjagi nisung 25,000 shibo

Railways nung shimok.

Lanurtem nem tenüingsang agüja Modi-i, "Tang iba jenjang tongtetba nung tsüraburtem aser kibongtemi shilem tajung agiogo. Nenoki takok anguba nung kibongtemi dang masü saka loktilibaia tongti shilem agiogo. Iba nung ya senco crore 140-ia shilem agiogo," ta ashi.

Rozgar Mela sentong tetenzüklen jembidang Minister of State for PMO, Personnel, Public Grievances, Pensions, Dr. Jitendra Singh-i, iba ama Melas ajanga mapa nung shimokba inyakyim teladak asüba sayur, ta metetdakja liasü.

Paisa, mapa nung shimba candidate temi online ajanga training courses agütsü atema Mission Karamyogi platform nung tenüing agütsüttsü, ta metetdakja liasü.



May 23, 2026 nü Kerala Chief Minister VD Satheesan-i New Delhi semdanga Congress Parliamentary Party (CPP) Chairperson Sonia Gandhi, Lok Sabha nung opposition lenir Rahul Gandhi aser Congress MP, Priyanka Gandhi nung ajurua senden amenba sülen tangokba noksa nung angur. Satheesan-i CM tenangzükba agiba sülen tang mezüing Delhi semdang.



TIR YIMYIM

YIMOBILEM (EDITRIAL)

DIMAPUR SUNDAY, MAY (MONUPII) 24, 2026

Temeshiba lartem

Kodang asenok temenen nisung liasü, idangji asenoki inyaknüba inyak masü saka temeneni inyakdaksünüba asenoki inyak ta asenok temulung meyipa sülen tali jangjaa metetter. Aji oda, asenok temenen nung ali tashi asenok temenen lar liasü. Tetezü asenok madak temenen kibur südaktsünungji asenoki mulungba ama inyaktsübaji asenok atema mapa kanga tasak liasü, kechiyong alari kiburi ashi angatsüla. Aji oda, asenoki yi mejemner saka ajemer, moko aser sali mechner saka achir, nüktapangta mebenshiner saka benshir, tiyazü aser tangar anema mejembiner saka jembir, kechiyong itemji asen madak kibur temeneni mulungba mapatem lir. Anungji, asenok kibur temenen talenba nungi asenok mechiok tashi asenoki mulungba masü saka kiburi mulungba inyaktsüsa akümer. Atangji, asenok meimchir taküm ya alima nung teti alitsüba aru masü, saka yangi ken lir külen teti alitsüba limajibo molumi mesüra kotak lir. Aji oda, asenok alima nung ken alidang kibur ka mesüra ka kübokbosa alitsübaji alima yimya dak keta lir, kechiyong teti alitsüba alima ana nungjia kibur kaka lir aser asenok alima nung alidang kibur ana rongnungji koba kübok asenok alarsa lidir, iba kasa kibur meyong lima nungji oagia asenok alarsa alitsü. Tanü asenok alima nung alidang asenok teti alitsüba limaji penzüa asenok madak kibur asütsü raktepba kibur ana, ka temeshi aser ka temenen, ana rongnungji ka shima tenzüksüla. Ibayongji, Laishibai ashir, " Nenoki tashi angaa shiba nem peisasa alartem ama bendanga agütsür, oda tasüba dangi anisang temenen süshia mesüra temeshiba dangi anisang dang tashi angatsü süshia, nenoki shiba dang tashi angar pa purtem nenok lir." Rom 6:16. Tetezü asenok alima nung alidang alarbo alar amasa asütsü, saka asenok jangratema alitsüba malitsüba aser teti tepeladak alitsüba malitsübaji kibur dakji dang keta lir, kechiyong asenokbo alar asünungji kiburi kechi shidir ibaji dang inyaktsü. Anungji, Laishibai ashir, asenok taküm madak temenen kibur mesüdaksütsü aser asenok temenen lar masütsü asoshi Yisu Khristai pei taküm bendang agütsü, anungji tangbo asenok temenen lar masü saka temeshiba lar lir. Aji oda, Laishibaisa yamai ashir, " ... Tsüngrem nem tenüngsang agüjang, kechiyong nenok temenen lartem liasü, saka nenoki temulung ajak agi nenok nem agütsüba tesayuba nung tashi anga aser temenen nungi nüji kümer külen, nenok temeshi lartem küma lir." Rom 16-17-18. Anungji, joko asenok temenen lar masü saka temeshiba lar asünungji, temeshibai kechi shidir aji inyaker. Aji oda, joko asenok temenen talenba nungi salarbo asenok madak kibur kata mali ama asenok inyaknütsü inyaktsü aser jembinütsü jembitsü ta masü saka ano asenok madak temeshiba kibur lir, anungji asenokji temeshiba lar asütsü. Aji oda, asenokibo temenen mapa inyaknüa alitsüa akok saka asen kibur temeshibai memelar anungji asenoki meinyaker. Asenok temenen nung alidang kechi koda asenoki temeneni mulungba inyak yamaji asenok taküm nung Yisu Khrista kibur kümdaktsür sülenbo temeshibai mulungba ama inyaktsübaji asenok mapa lir. Atangji, Khristan kümer külenbo temeshi alitsübaji asenoki linüra alitsü aser melinüra malitsü ta masü saka alitsüla. Temenen talenba nungi salar asenok Khrista nung nüji akümbaji asenok inyaknütsü inyaktsüba nüjiso masü saka tanüla temeshi nem asenok anidaktsütsü aser Tsüngremi mulungba inyaktsübaji asenok mapa lir. Aji oda, asenok temenen nung alidang kechi koda asenok temenen lar kümer ali, yamaji asenok temeshi nung alidanga temeshi lar kümer alitsübaji Tsüngremi mulungba lir. Yimten nüjiso akaba lima nunga senso ka pei linütsü malir saka linük temzüng ozüng kübok alir, aji oda kodang asenok temenen talenba nungi Tsüngrem taochi agi kümzük, iba mapang nung jagi asenok taochi kübok temeshi lar kümer Tsüngremi mulungba nung jajar. Iba tajangzükji teti taküm angutsü saka temenen lar asüba taabo tasüba angutsüba liasü. (Rom 6 : 22-23).

OLEMSABANG

AJEMALUBAASER OCHISHIBANUNG TEMOATSÜ

~ IMTIKUMLA IMCHEN

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Ali wadang balala inyakdang taküm chiyongtsü puküma senzü dang ken kenbo balalasa inyaktepa ano jaka-a balala nung alidang menungratepa kati ka bilemtepa inyak. Joko parnok chirnurtem tain küma kibong kümteta tsürabur nungi pila-a ali. Kibong shia pei yari inyaktepa chia jema ali. Konung par kinunger sarasadema amongtsü jembir senshi. Iba aonungji tetsür chanu katipungmang ka pungmang lai la pungmang nungji la schooli aoba mapang anung rangketa reprangldangji ita ya tulu ka sentsüa meti ama temesüng kümer la kolak bang nung angu. Lai repranga lia Itaji ali-i alua la tsüngdang anen, lai itaji shia arur mopung aser tzü bushia itaji shisa pungmang, lai tetsü dang ashi saka tetsüi tetezü meshitet. Anogo Ishika or lai kodanga mungudangba tambur ka ajuru, tambursangi menürema la den jembir. Tena kodanda metetepba mali sür nung tsürabur aser chirnur ama pelatepa jembir. Idangji tanutsüla pungmangji tebou dang ashi nung tebou Shinga danga nü pungmang Teshima Tsüngrem tenüngsanga ata-a liang, mapang ka arutsü na sempet tulu akaba tetsür ka akümtsü ta ashi. Lai kidangi arua tetsü o tebu na


dang tatalokbaji ashi nung tebu menüremloktsü, iba anogoji lar kibong ajak Kibuba dangi meyipdi ta asüba onük amshia sarasademtsü ayongzüker liasü, jembiba ama kinunger ajak sentepa sarasademji agi. La taküm lia aodang la ama yimti nung tesangra aser kümlü tajung, ajemalu Tsüngrem meimba shisatsü nung shiangaia madoksai liasü. Kodang la school züngtem teti tanurtem anidena ken sayua aser sarasadema anishi. Tanurtem ajaki kanga meima lai ashiba anga.

Kenü aluroba mapang ka nung tsuk abener nisung aika külemi alu nungi adokya angu. Lai parnokji ngua temulung raksaajep. Item tsük abener to lar kinunger yongzük dang saku saka lar kinunger karbo süadoker madenba agi temulung shirangba liasü. Alima yimya agi nisung tajungji tenük meremera, tesempartema alir asünung tansütsüka amai atalok. Lar medemer kati lai auya ta tai tonglokja obendanger nem agütsü. Iba o agi alima ajunga asünger amai jembir, saka aikati mamang kechiyong lai Yamala inyaktsü nisungtemi meimla, lar lima nung ozüngji tesashi shibai auyadir tasüba agi merenshitsüba liasü. Kodang obendangtsü mapang atong lai kecha shisa mebulu kechiaser la dak yamalashisatsü maliasü, saka la medemtsüla bo asüktena jeba ata. Kodang obendangeri tiyazü jembir ta kuli angu la ashioktsüla tasüba agi merenshitsü obendang agütsü. Joko koda masüba tia nung alidang tanutsüla la melen niang südakjang ta obendanger dang ashi, saka tangar melen tangar asütsü ozüng nung mali ta langzü. Saka lai kanga mepishinung ozüng amertemi antokdangdi ne dak kaora la kümzüktsü saka la dak kaora labo tepsettsü ta shir antokdang. Tamajungera Tsüngremibo kümzüker ta alinung ochishila dak kao nung tenaprongla kümzük. Iba tatalokba osangji alima sünga prokshi aser meimchir ajaki la sanga teti taküm liang ta moatsü. Saka ashioktsüla tobo taoksa agi shiranga küm aika yaria lir asü. Yamaji ochishir takümba arishia pelaa lir Kibuba dangi shilanger saka tiyazü nung temulung lemer tangar ashiokjia alirbo taküm alidanga molumi süra molumi aor. Asenoki iba otsü ajanga angazüker, taküm alidang ochi shia Tsüngrem akhümtsübur takümji alima nunga tepela nung lir Kibuba dangi oa Kotak senmang ajangzüker.

Tsüngremi moajangma Amen .

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Muslim nunger aikati Khrista agizüker: Georges Houssney



Pastor Georges Houssney

May 23, 2026: Tang Middle East nung tensa mejungi aliba mapang nung Muslim nunger kibong aika kanga timtemdar aser tarutsü tia memeteti ratamadar, ajisüaka aikati Yisu Khrista agizükdar, ta Pastor Georges Houssney-i metetdaksü.

Horizons International nungi pastor Houssney-i, Muslim nunger aikati Islam yimsü ashishi tenzükgoko aser aikati Yisu Khrista dangi meyiper, ta metetdaksü.

South Korea yimtiba, Seoul nung osangbenertemi Pastor Houssney den Syria, Lebanon, Turkey aser Iraq linüktem nungi Islam yimsü toktsür Khristan yimsü agizüker telok ka den jembia liasü.

Islam yimsü toktsür Khristan yimsü agizükertem jagi, tangbo parnok talenba nungi salaogo, ta ashi.

Pastor Houssney-i tesüiba küm 50 dak tali Muslim nungertem den Khrista osangtajung lemsatepa arudar. Talisa pai Kurdish nungertem tenzüker.

1973 küm pai yaritepa Kurdish oshi nung Laishiba meyipzükja liasü, aser ibaji ajanga tangbo nisung aikati iba oshi nung Lai züngteter.

Tanübo alima tesem balala nung Kurdish nunger million 40 jungnüa prokshia lir.

Pastor Houssney-i, "Rara adokba shia aikati Khrista dangi meyiper. Nisung aikati alima dang jashir aser rara adokdaksüba yimsü dang jashir. Iran nung Khamenei aser

Osama Bin Laden na ajanga Khrista osangtajung proktsü maongka tulu agütsü, kechiyong tenati tiyazü teimla agütsü. Muslim nunger aikati, 'kechiba onoki teraksatsüba aser tepsetba yimsü ya amanger?' ta asüngdanga aikati Yisu Khrista ajanga Tsüngremer yimli bushir," ta ashi.

Pastor Houssney-i, "2011 küm Syria nung refugee tem timtemba mapang nung Khrista osangtajung proktsü atema maongka tulu ngua liasü. Lebanon kija nunga Syria nunger million 2 dak temai arrtsü adena ajen. Parnok lenmang nung nemzüa liasü. Parnok mapo maliasü. Parnok ket nung sen maliasü, anungji parnok aikati onok indang centers bushia aru. Ozü team nungi züngsemtemi lenmang nung item nisungtem ajurua Khrista osang tajung lemsatep aser tangbo Muslim nunger meyirjang aika Khrista dangi anir aruogo," ta metetdaksü.

Pastor-isa, ano Muslim nunger aikati pungmang-mangdang nung Yisu Khrista ajuruba sülen Islam yimsü toktsür Khristan yimsü agizükoko, ta metetdaksü.

Kurdish Ministry Director Pastor Nihad-ia pa Muslim nunger asüba mapang aser jail nung aliba mapang mangdang nung Yisu ajurua liasü.

Pastor Nihad-i, "Ni puokba takdangji tasazük metre kata masü, anungji ni temang-a junga marakzütepi liasü. Ni teka pezüa aküm aser temang kanga ayangashia liasü. Yisu Khristai

tsüngtsüker aneptsüba otsü ni bilemteta liasü, anungji ni Pa dang, 'Yisu, na atangji süra Nai ni yariang' ta ni sarasadema liasü," ta metetdaksü.

"Iba sülen ni mangdang nung nisung kati pa ket nung olive totzü amer kü takdangi aitba angu. Pai kü dak totzüji shiloktsüba shia kü temang nung ayangashi tajemba dang aküm," ta pai ashi.

"Iba mapang nungji ni kanga jashia liasü, kechiyong ni jail nungi anitetsü atema shingaia ni meyariteti liasü. Ni süadoknüa liasü, ajisüaka kü mangdang nung sübotsü temesüng ka semer alisang jagi kü dang 'Ni na meimer' ta ashi. Tang tashi iba oji ajanga kü melung sünetpsür," ta pastor Nihad-i metetdaksü.

Pastor Nihad-i, "Ni mangdang nung angusangji Yisu lir, ta ni meteta liasü, kechiyong tamalen sayutsüngir Billy Graham-i züluba kakat ka nung ni Yisu otsü züngshia liasü," ta ashi.

"Ni jail nung mepuokba mapang nung nisung kati kü nem iba kakatji agüja liasü. Iba kakat tatembanglen ni tekümet sarasadem indang züngshia liasü. Ibaji ajanga Tsüngrem O angashitsü atema kü tanela tenarong lapoktsü asütsüa akok," ta pai ashi.

Iba sülen ita trok lir Nihad jail nungi chiok, aser tangbo pai alima tesem balala semdanga pa taküm kuli lemsatepa arur.

Pastor Houssney-i, ano Muslim nunger aikati Khrista agizüktsü, anungji Arogotemi iba atemaji renema alitsüla, ta ashi.

Paisa, "Kibubai tanela aika anir arutsü aser parnok tashi itdaksütsü atema onoki sarasademer. Kechiyong tanü Muslim nunger million aika Khrista dangi arura parnok nütsüngsütsü atema asenok nübo peria mali. Alu tamen aruhtsü atema mapa inyakertem jenti yokang ta asenoki Kibuba dang sarasademtsüla," ta ayongzük.

ANO GO ABEN TSÜNGREM DEN

KIBONG TSÜTSÜ KETA ASENBA

"Parnoki tamasa parnok pei kibong tsütsü keta asenba sayutsü aser pei tsürabur tayang kepzükdakjang, kechiyong ya Tsüngrem madang tagizüktetsü lir"

~1Tim 5:4

Kibong ya ajak madak tematiba temeshi jenjang menden ka lir. Ajagi Kibong ya akümstübuttsüla, meimtsüla, aser tushitsüla kechiaser iba kibong nung ya Tsüngrem teti lir. Kibong nung tongti shilem agirji asen Tsüngrem, Tsürabur aser chirnurtemji lir. Koba kibong nung item shilem agir yagi shilemji tim agi magiteter, Tsüngrem tsüngdang tasüngdangba alitsü aser iba kibongjibo azükaru nung malitsü. Tanü alima aser lokti libaliru nung kechiba temeim aser yimjung ya malir mesür samaa aor, iba tebilemstü ya kechi nung pokteter? Asen kibongji khen meyipa reprangshitsüla.

Koba kibong nung Tsüngrem tsübuba aser Pa den tesentaktep shitak alir aser benshir iba kibong nungji teti Tsüngrem temeim moshia alitsü aser Pa temeim ajanga, iba kibong nungi yimlibilem teti poktetsü. Koba kibong nung item yimya lidir yimlibilem dang masü saka tatok agütsüba pei kibong nungi teti tenzüksü.

Asenoki kodang asen kibong nung tatok magütsütetba, temeim mebenshitetba sayudir iba kibong nungji kodanga tepela tesünep mangutsü aser iba kibong nungi adokba süngjang jagi lokti nung kodanga tesüngjem melii yimsü asütsü. Atangji sayubentsü shitak, ochi tashi sayutetba atep nungi adokba kibong jagi Tsüngrem teti sentsüwangshi atalokdaksütsü aser Tsüngrem temoatsü iba kibongi ajangzüktsü.

SARASADEM:

Temeim Tsüngrem, Kibong ya na lir aser iba kibong nung tematibaji Na lir, atangji kibong teti shitak nung wazüka ayutsü onok nem Ne tashi agüjangma. Amen

Central Africa Church nung tang mezüng tetsür 14 'ordain' süogo



May 23, 2026: Tawa Church of Anglican Province of Central Africa nung tetsür 14 'ordain' süogo, aser ibaji par Arogo otsü nung tang mezüng asütsü.

Tan ita tetenzüklen Botswana nung aliba Anglican Holy Cross Cathedral nung iba

sentongji agia liasü aser ibaji ajanga Anglican Province nung puti otsü tasen ka yangluogo.

Iba sentong nungji South Africa nung Tir kinüngtsü Dr Tshepo Motsepe aser Central Africa nung Archbishop Rev. Albert Chama nata densema

liasü.

Kasa sentong nung region nung aliba putirtem, Botswana, South Africa, Zimbabwe, United States aser Church of England nungi putirtem aser Evangelical Lutheran Church of Botswana nung lenirtema liasü.

Central Africa province nung tesüiba küm aika tetsürtem 'ordain' asütsü atema o entepa aruba sülen tang tetsürtem ordain süogo.

2023 küm November ita nung Diocese of Botswana-i tetsürtem ordain asütsü benoka liasü aser Diocese of Harare-ia ibaji pusema agizük.

Tawa ordain asürtemji Diocese of Botswana densema province nung putir inyakertema densema liasü. Parnok

rongnung Rev. Beauty akümstüla," ta ayongzüka Autlwetse-a densema lir.

Archbishop Albert Chama-i, iba ya Tsüngremer mapang ka nung ataloker, ta ashi.

Paisa, iba sentong ya puti otsü ka akümstü aser linük nung aliba Arogo atema tang tetenzüker ka asütsü, ta metetdaksü.

Iba sentong nung Tsüngrem O jembidang Bishop of Pretoria-i, "Putir ka akümbaji tenzüksü atema lir. Aiben alimai lenisüba menden ya tashi aser jenjang ama züngshir, ajisüaka Yisu Khristai Kangki mapudang Pai tamasa tetsüng shidoktsü, ta asenoki kodanga mamadoktsüla. Kü aianutsürtem, Khristai melungba ama sannükertem

Rev. Beauty akümstüla," ta ayongzüka liasü.

Rev Canon Dr Rachel Mash-i, "Iba anogo ya tesüngmangtsü anogo ka lir. Kishitem lapokba atema Tsüngrem nem tenüngsang agtsüdi. Asen aianutsürtem karibo küm 10 dak tali ata-a liogo aser karbo anisüngzüktsü mapang tongogo. Tsüngrem denra tamakoktsü kecha mali," ta ashi.

Joko tang nungibo Anglican Arogotem ajak nung tetsürtem ordain asütsü akok. Anglican Communion indang province 42 nung tetsürtem ordain asütsü akok aser putir inyaktsü akok, talisa Europe, America, Africa aser Asia tesem aika nung putir inyaktsü akok.

AO OSHI ANGAZÜKDAK:

TANÜ ANGAZÜKTSÜBA OJANG



Yi

(n) Temesepba tajemtsü (alcohol, liquor, wine)

* Nagaland nung yi yanglutsü aser ayoktsü memelar.

Yiar

(n) tokolok meshitak akümba , nüchi masü (insane, mad, lunatic)

* Yiar den kasasa metokteptsüla.

OLONG PAITEP # 7513

Grid for OLONG PAITEP # 7513 with numbers 1-16 in various positions.

TIPIEN

- 1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidoong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7512 TELANGZÜBA

TIPIEN :

- 3. Auya, 5. Tekoro, 7. Yong, 8. Mata, 10. Asen, 11. Anentsü, 12. Lisü, 13. Ak-ki, 15. Ajak, 17. Indang, 18. Okar.

LANGTSÜNGLEN :

- 1. Atema, 2. Komo, 3. Aong, 4. Yongsük, 6. Tsüngi, 7. Yanü, 8. Molung, 9. Tasazük, 10. Asak, 14. Kanga, 15. Apir.

NAI-A YA METETTER



Alima nung "longest continuous outdoor display of manga pages" ji Saga City, Japan nung yanglua lir. Iba dang "Kingdom Reading Breakwater" ta ajar aser Volume 1 nungi Volume 78 tashi otsü tapak ajak yanglua lir. Iba manga "Kingdom" ya Higashiyoka Town nung aliba Higata Yoka Park nung 300 meters dak tema yanglua lir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Meghalaya nung linük 13 counter-terror military exercise agir



Shillong, May 23, 2026

(Agencies): Meghalaya nung Umroi Military Station nung May 20, 2026 nungi hopta ana multinational military exercise tenzükogo.

Iba exercise nung linük 13 nungi defence personnel-i counter-terrorism operations in jungle aser semi-mountainous terrain nung temulung agüja shilem agir.

Iba sentong dang 'PRAGATI 2026' ta ajar aser India den partner nations 12- Bhutan, Cambodia, Indonesia, Laos, Malaysia, Maldives, Myanmar,

Nepal, Philippines, Seychelles, Sri Lanka aser Vietnam nungi sepaitem adenshia shilem agir.

"Iba joint exercise ajanga interoperability aser coordination tajungba akümtsü nükjidoong lir. Sepaitem tactical drills, joint planning exercises aser simulated counter-terror operations in difficult terrain conditions nung shilem agütsü" ta Defence PRO Lieutenant Colonel Mahender Rawat-i ashi.

Indian Army-i Centre sorkar Atmanirbhar Bharat kübok yangluba indigenous defence

equipment aser innovations sayutsü. Iba exhibition ajanga foreign contingents aser Indian defence manufacturers tsüngda sensaksemtsü sabang agütsütsü.

PRAGATI ya 'Partnership of Regional Armies for Growth and Transformation in the Indian Ocean Region' lir.

Bodbarü Additional Director General of Infantry Major General Sunil Sheoran-i tesentepertem pelaa agizük aser külemi security tayongzükbatem anema inyaka aotsü nenshia metetdaksü.

Centre-i NEHU Vice-Chancellor tasen shimtsü mapa tenzük

Shillong, May 23, 2026

(Agencies): Centre sorkari North-Eastern Hill University (NEHU), Shillong nung Vice-Chancellor tasen ka shimtsü asoshi mapa tenzükogo.

Ministry of Education-i Bodbarü iba mapa asoshi candidates nungi online applications meshiogo aser iba maparen ya June 18, 2026 tashi alitsü ta parnoki shiogo.

Vice-Chancellor mapa asoshi candidate temi university ka nung küm 10 professor ama

inyaker alitsüsa mesüra research mesüra academic administrative rejutem nung kasa mapa inyaker ka asütsüla ta Ministry of Education-i metetdaksüogo.

Vice-Chancellor asoshi shimba candidate nem fixed monthly salary Rs 2.10 lakh den Rs 11,250 special allowance aser tanga applicable benefits agütsütsü ta parnokisa shiogo.

NEHU nung mapang talangka mepetmesüa aruba sülen Ministry-i iba mapa tenzükogo.

NEHU nung tang teinyakdak Vice-Chancellor Prabha Shankar Shukla-i November 2024 nungi leave agir campus nung malir. Kaketshirtem aser tesayurtemi pa anema lungkak aittsü tenzükba sülen pai campus toktür ao.

Taoba ita ishika tsüngda kaketshir aser tesayur teloktemi lungkak aitba sentongtem agiogo aser Centre dang university ketdangsübaren nung tiyongi aitsü ayongzükogo.

Assam Rifles & Indian Army-i flood relief exercise agi

Agartala, May 23, 2026

(Agencies): Tripura nung Assam Rifles aser Indian Army külemi Joint Flood Relief Training exercise ka agiogo.

Tripura nung tzümetsüng tensa ajurudang disaster response renema alitsü atema

iba sentong agi.

Iba sentong ya disaster management capabilities tajungba akümtsü aser rescue & relief operations timi agitetsü atema agiogo. Assam Rifles aser Indian Army sepaitemi joint drills nung

shilem agia liasü.

Tripura nung tzüngluruwa mapang tzümetsüng timtem ajurur aser iba jagi relief & rescue operations atema disaster response maparen akanga alitsü kanga nungdaker.



Fame India magazine-i 2026 küm asoshi national-level survey ka agia linük nung tematiba District Magistrates aser District Commissioners 100 shimtetba rongnung Morigaon District Commissioner Anamika Tewari dena lir. Anamika Tewari ya 1997-batch senior administrative officer ka lir aser lai Morigaon district nung ketdangsübaren, terenlok aser public administration nung temulung kanga agüja mapa tajung aika inyaka arur. Lai administrative maparen dak alia grassroots governance aser public outreach initiatives nung temulung agütsür. Morigaon nung aliba school kari High School Leaving Certificate examinations nung takok tajung mengutet aser iba atema Anamika Tewari-i school tem semdang, kaketshirtem, tesayurtem aser tsüraburtem den ajurutepa sensaksema liasü aser laisa classroom teaching nunga shilem agi.

China mijang atudak apok, nisung 90 shi asü



China indang Shanxi Province kübok Tongzhou Group-i inyakba Liushenyu Coal Mine nung lendong atalokba sülen rescue workers tem ambulance ka ajanga aoba noksa nung angur.

Beijing, Monupii/May 23

(Agencies): China north tsütsü mijang atuba tesem ka apokba lendong nung nisung 90 shi asü, ta linük indang state media ajanga ashir.

Iba lendong ya Shanxi Province nung Tongzhou Group-i inyakba Liushenyu Coal Mine nung ataloka liasü.

Iba tesemi tekumzüker nisung noklang aika yoka lir. Nisung 27 tang tashi mozü kidang temang anepalutar aser ka kumzüksü teimla mali. Iba tesem nung rescue mapa tanga teinyakdak lir.

Shanxi nung mijang atuba tesem nung iba lendong ya Hokulbar nikongdang 7:30 ako meta atalok, aser lendong atalokdang nisung 247 mapa inyaka liasü ta ashir.

Mozüki nung alirtem rongnung ka kangasa sashia yirur lir aser tanüingba ya tilateri yiruba lir. Nisung timba miim aketba gas saokba agi kongshi, saka komala gas'ar ano mejangja, ta state media-i ashir.

Yirur alir mijang atur Wang Yong-i state media dang ashiba agi, iba lendong atalokdang pai kecha mangashi saka ajungbena mokozü adokba angu.

"Ni sulphur menem, koba long poksaba mapang menemer. Ni nisungtem dang asemtsü ayimoktsü. Ni asema ajenba mapang nisung aika mokozü agi laoba angu. Aser nia lao," ta pai ashir.

"Ni yangji ghonda ka mesüra tali mejanga ali aser küsasa saktet. Ni anasa alisang ni meso aser onok külemi adok."

Iba lendong atalokba sülen China Tir Xi Jinping-i yirur alirtem yaritsü aser takum alirtem bushitsü asoshi mera ajak agitsü metetdaksüogo.

Pai sorkar dang iba lendong tenzüka tera bushisüingdangtsü aser aibelener nem temerenshi agütsütsü shiogo.

Iba mijang atuba tesem ketdangsurtem pua lir ta state media ajanga ashir. Iba tesem nung 'gas explosion' ya kechi ajanga atalokar ano mesangdong, saka iba tesem nung carbon monoxide - miim tesashi aser tezüknem maliba gas - kanga talila liasü ta state media-i ashir.

Iba operation nung yariteptsü asoshi China indang Ministry of Emergency Management-i rescue teams trok nungi nisung 345 yokogo.

Chinese National Mine Safety Administration ajanga 2024 küm Liushenyu mine ya "severe safety hazards" nung ka ta züngshia liasü.

Safety issues atema 2025 küm iba mine ketdangsur Tongzhou Group nem ketdangsurüi temerenshi anaben agüja lir ta ashir.

China nung mejang atuba shilem 25 dak tema Shanxi province nungi lir. 2000s tetenzüklen China mijang atuba industry nung iba ama lendong ya mapang shia ataloka liasü. Tang safety standards tesashiba kumogo, saka lendong maneni ataloker.

2023 küm northern Inner Mongolia region nung open-pit coal mine ka chirepa nisung 53 asü.

2009 küm linük northeast tsütsü Heilongjiang province nung mijang atuba tesem ka nung apokdang nisung 100 dak tema asü.

Renewable energy kanga keraa inoka oaka alima nung mijang timtiba China-i amshir aser greenhouse gases timtiba adokdaksübjaja China ya lir.

US Tir Donald Trump aser Russia Tir Vladimir Putin nati linük semdang anogo ishika dang lir iba lendong ya atalok.

Mangatetep jenti liaka Iran-i US peace proposal asadanger

Dubai, Monupii/May 23

(Agencies): Tezüngzüktep ka yanglutsü asoshi jembishinüba nung takok mongura Iran amaktsü US Tir Donald Trump indang administration renemer ta osang temai adoka aliba mapang Iran indang mission to the United Nations ajanga Washington-i tali-tapong meshiba ajanga yimjung ken o jembiba laotsüsa nongshir ta tai tongloktsü.

Pakistan army tekolakba Asim Munir, Hokulbarnü Tehran tonga aonung menua Iranian Foreign Minister Abbas Araghchi den senden amen. Tenati tang tesüsa yimjung asoshi inyaktepba aser tensa tamajungba nungi kumzüksü asoshi mera agiba nung tangatetba lemsatet, ta Araghchi indang Telegram channel nung

ashi.

Hokulbarnü Trump-i par jabaso kiyomba sentong nung pa madentsü aser sorkar dak sendakba tensa mechi Washington nung alitsü ta ashiba ajanga tensa mejungi kumogo ta aikati angateter. US tiri tan hopta yimjung ken o jembishinüba ya asendenshir amaktsü aser rara tembangtsü atema tezüngzüktep ka yanglutsü tsüngta nung arütsü ka nung lir ta ashir.

Iranian Foreign Ministry odongtar Esmaeil Baghaei-ibo Munir aruba ajanga temelenshi jenjang ka tongogo mesüra tensa tamajungba kumogo ta ashir masü, kechiaser mangatetep tulu lir, ta ashir.

Araghchi-i phone ajanga Turkey, Iraq, Qatar aser Oman foreign minister tem aser UN Sec-

retary-General Antonio Guterres den jembigo ta ashir.

Pakistan Ato Kilonser Shehbaz Sharif aser Foreign Minister Ishaq Dar na anogo pezü atema China-i ogo aser yangji tang mepetmesü aliba angatetep asoshi jembitsü imlar. China ya Iran asoshi shishilempaba tsütsü tembar tajung ka lir.

US-Israel ajanga February 28 nü Iran amak tenzüka ajanga alima rongsenketzung nung kongshia lir, kechiaser Iran-i Strait of Hormuz shibanga lir.

April 8 nü ceasefire sangdongba sülen hopta ishika jembishinüba aruba nung pangzüng tejangja kata yanglua mali mesüra Strait ajunga lapoka mali, anungji totzü abenba nung timtem tamajungba akumer.

Ukraine-i kaketshir aliba tesem amakba tayang kepzüksü: Putin

Moscow, Monupii/May 23

(Agencies): Ukraine anüdoklen Russia-i amokbanga aliba tesem nung kaketshir aliba dormitory ka Ukraine-i makogo ta tai tongloktsüba sülen Russia Tir Vladimir Putin-i tayang kepzüksü nangzüük.

Luhansk region nung aliba Starobilsk jila nung ammansangwa tsüngta amakdang nisung ter tepset aser 38 yiru, ta yangji Russia-i yariba goverenor-i ashir. Ano nisung 11 samar bushir ta paisa ashir.

Ukraine mitkari ashiba agi, Starobilsk nung Russia indang elite Rubicon drone military unit indang headquarters amak. Ajsüka iba ya Russia-i ashiba ki ya asü masüar mashi.

Ajsüka Putin-i yangji military facilities, intelligence service facilities mesüra sendaktepa aliba services kecha mali ta ashir.

"Anungji ozü air defence mesüra electronic warfare systems mechi amak ta ashitsü khenyongi tamendak dak maka," ta pai Hokulbarnü Moscow nung par Kremlin kidang ashir.

Pai Russian mitkar dang koma telangzüba agütsütsüar "proposals" renemang ta totuyuba agütsüogo.

Ukraine-i drones 16 amshia shilem asem lemsar amak ta Russia leniri ashir.

Russia indang Black Sea nung aliba Novorossiysk rongnendak totzü yua aliba tesem ka nung drones teraksa tsüka mi adok aser nisung ana yiru, ta Honibarnep Russian ketdangsur temi ashir.

Southern Krasnodar region indang general headquarters-i ashiba agi, 'technical administrative buildings' kar nung mi jangru aser drones teraksa kar

fuel terminal ka nung tsüük.

Ano iba tesem nungi north tsütsü Anapa rongnendak yimti nunga jurila ki kar raksatsü ta general headquarters ajangasa ashir.

Ukraine mitkari Hokulbar aonung menur ashiba agi, parnoki Starobilsk nung Rubicon indang headquarters nung tenük yoker amak. Iba headquarters nungi special drone unit ajanga mapang shia Ukraine nung civilian aser civilian ki o jen amaker ta tai tongloktsü.

Sangdong nungsa Ukraine sepaitemi international humanitarian law, ozüng aser rara yimya shidak amshia mitkar atema amshiba ki o jen aser facilities raksatsür, ta ashir.

Brehostibarnü Ukraine Tir Volodymyr Zelenskyy-i Ukraine indang southern Kherson region nung Moscow-i rakzüka tesem nung Russia indang security service FSB headquarters amak ta shia liasü.

Russian "occupiers" 100 shi tepsetogo mesüra yirutsüogo, ta pai ashir.

Moscow mitkari iba tatalokba indang sangdong kecha agüja mali, saka Kremlin bhukumba Telegram channel kati yangji drones aika amshia amakba sülen asü-amaba lir ta shia liasü.

2022 küm Moscow-i tashi ajak amshia Ukraine amak tenzüka sülen Russia indang mitkari asaa civilians dak tenük yoker ta Ukraine-i aiben tai tonglokja lir, saka Moscow-i kodanga magizüker.

Taoba hopta Ukraine yimtiba Kyiv nung Russian missile kati anüngleni atongtepa tua süa aliba ki ka raksatsüba nung tetsür asem densema nisung 24 asü ta Ukraine ketdangsurtemi shia liasü.



Iran indang Islamic Revolutionary Guard Corps den sendaktepa aliba Iraq nung kiralongrar kati US Tir Donald Trump'er jala Ivanka Trump tepsettsü tasa yanglu. 2020 küm US-i drone amshia amakdang Iranian commander Qasem Soleimani tepsetba mechi arishi küm 32 tain Mohammad Baqer Saad Dawood Al-Saadi-i Ivanka Trump tepsettsü nangzüka liasü ta ashir.

India U18 Girls Basketball Team Sentiningsang Longkumer ketdang asütsü



Dimapur, Monupii/May 23 (TYO): Sri Lanka nung May 25-29 anogotem asayatsü aliba FIBA U18 Asia Cup - SABA Qualifiers 2026 atema India U18 Girls Basketball Team nung Team Manager asütsü Nagaland Basketball Association indang Honorary Secretary, Sentiningsang Longkumer shimogo.

Manager ka ama Indian Basketball Team anitsü Naga nung basketball administrator rongnung pa mezüngbuba alitsü, koba region asoshi tongtipang alizüng ka asütsü. Sentiningsang Longkumer ya Nagaland nung Basketball Federation of India (BFI) nung Executive Member ka lir.

Iba tetsür telok qualifiers nungya India, Maldives, Bangladesh aser Sri Lanka lir.

India tsürtem tetoktepa yamai alitsü:

May 25, - *India vs Maldives (Girls)*

May 26, - *Bangladesh vs India (Girls)*

May 27, - *Sri Lanka vs India (Girls)*

May 29, - *Final (1st vs 2nd, Girls)*

India nung U18 Girls aser U18 Boys team tem continental qualification atema tokteptsü.

India U18 Girls Team nung asayartem Aditi Subramanian, Angelina George, Mahek Sharma, Nethra Birudavolu, Vaishnavi Pardeshi, Viha Reddy Jonnalagadda (C), Reva Kulkarni, Jeffrin Anto, Saanvi Kolisetty, Sanvi Ranot, Taarushee Tarun, Tarannum Begum aser Head Coach Sarah Dawn Gayler alitsü.

Iba den Coach Anitha Paul Durai, Coach: Saloni, Trainer Manoj Singh Sisodiya, Physio Reshma Senthil Kumar aser Head of Delegation/Team Manager Sentiningsang Longkumer alitsü.

India U18 Boys Team nung asayartem Aakash Iyappan, Abhyupang Mishra, Arman, Chirag, Fatehjeet Singh, Joypreet Sidhu, Khushnaz Baidwan, Krishna Suneriya, Piyush Choudhary (C), Ronaldo Hopkins, Priyadharsan Rathinam, Shekhar Rathee aser Head Coach Paramdeep Singh, Coach Vipin Kannan, Coach Rohit Kumar, Coach Loganathan Thiruvengadam, Physio Krunalkumar Rajeshkumar Chudasma aser Team Manager Wanlambok Lawphniaw alitsü.

North Korea nungi Naegohyang-i Asian Women's Champions League akok



Suwon, Monupii/May 23 (Agencies): North Korea nungi Naegohyang teloki Honibarnü Asian Women's Champions League final nung Japan indang Tokyo Verdy Beleza madak 1-0 agi takok nguogo, kong Kim Kyong-Yong-i iba asaya nung goal ka ya agüja liasü.

Naegohyang ya taoba Deobarnü ang Suwon-i arua Bodhbarnü semi-finals nung hometown team madak 2-1 agi akok, aser ibai North Korea nung asayar temi küm ti nung South semdangba mezüngbuba alitsü.

North Korea-i küm ishika jakdang South Korea ya "most hostile state" ta sangdonga 1950-1953 Korean War ajanga sadangba linük tanaben lungjemtsü teimla maliba mapang parnok arua liasü.

Honibarnü Suwon Sports Complex nung final asayaba

mapang Tokyo Verdy teloki par opponent tashi memenep aser counter-attacks asoshi aiben lenmang sadema lapokja liasü.

Naegohyang teloki goal ka ya halftime atongtsü minute ka lia agüja liasü. Attacker Jong Kum kanga keraa asema abelen tsütsü Tokyo Verdy defender Yuna Aoki alema ao aser cross yokba Kim-i idaktsü.

Second half nung Tokyo Verdy-i goal kepzüksü kanga merang, saka parnoki Naegohyang defence nongpoka motet.

Asian Women's Champions League inaugural season ya 2024-25 nung liasü, aser champions nem senpet sen \$1 million agütsür.

Naegohyang captain Kim, shibai asayamung nung goal timtiba (pezü) agütsür rongnung aden, la player of the tournament sangdonga liasü.

"MVP akokba asoshi ni kanga pelar. Ajisüaka iba takok ya kü kisüng atema masü. Ibai team aser coaching staff tem meyong lir. Onoki tatem tashi kanga meranga asaya," ta Kim-i ashi.

Iba takok ya ajanga Naegohyang ya taruba küm FIFA Women's Champions Cup aser 2028 küm mezüngbuba Women's Club World Cup asoshi qualify asür.

North Korea nungi continental level nung toktepa tetsür club rongnung Naegohyang ya mezüngbuba alitsü.

Mapang talangka North Korea ya tetsür football asaya amokbanger aru aser 2000s mapang Women's Asian Cup titles asemen nguteta lir.

Ajisüaka 2011 World Cup mapang asayar pongu dak nokdanga aliba mozü putetba sülen parnok 2015 World Cup nungi masayadaktsür.

India nung FIFA World Cup 2026 reprangtsü teimla angur

New Delhi, Monupii/May 23 (Agencies): India nung football sapurtem anisüngzüksü kuli ka ngutetogo.

Hopta aika timla makai terata nung lia aruba sülen 2026 FIFA World Cup ya India nung live sayutsü amai ajiteter.

United, States, Canada aser Mexico nung June 11 nungi iba asayamung tenzüksü hopta asem majung anünga lir, saka alima nung football asayamung tulutiba atema Indian broadcast partner dak sendakba sangdong kecha mali.

Iba ama ola madoki aliba yong football meimer tem tebilemtsü kadaktsü, kechiaser iba asayamung ya ulura aser India nung football repranger jenti lir.

Saka taoba All India Football Federation (AIFF) general secretary Shaji Prabhakaran-i tezüngzüktep yangluba indang osang tejangjatiba amai agütsüogo.

Prabhakaran-i social media X nung Indian broadcasting rights atema jembishinüba temogo aser yakta sangdongtsü imlar ta ashi.

"Ataba tembangogo. Jembishinü renemogo, aser India nung FIFA World Cup 2026

broadcasting partner atema taruba hopta sangdongtsü imlar," ta pai post nung zülua liasü.

Tang tashi FIFA nungibo tejangja kecha sangdonga meliaka, iba update ya India nung football reprangtsüpur asoshi anisüngzüksü tulu alitsü.

Broadcasting rights ayoktsü atema jembishinütsü FIFA media rights executives tem tawa India-i aru, ta Reuters-ia shia lir.

Ajisüaka iba jembishinü nung shilem agirtem aser item senden indang FIFA-i ola madoker.

2026 aser 2030 FIFA World Cups atema Indian broadcast rights asoshi FIFA-i sen \$100 million shi meshir ta osang ajanga ashir.

2022 küm Reliance Industries indang media division-i Qatar World Cup sayutsü temeden ya sen \$60 million shi agi alizük ta ashir, aser tezüngzüktep ya asayamung tenzüksü küm ka dak tali lia yuanglutep.

Ajisüaka taküm iba asayamung asoshi menuba ya balaka lir, anungji broadcasters temi infrastructure amenoktsü, promotions tenzüksü aser advertising inventory ayoktsü hopta ishika dang lir.

Premier League player of the Season atema Bruno Fernandes shimogo

London, Monupii/May 23 (Agencies): Manchester United captain Bruno Fernandes ya Premier League player of the Season lir ta sangdongogo.

Portugal nungi football asayar tejen Fernandes ya tan ita Football Writers' Association men's Player of the Year ta sangdonga liasü.

Fernandes-i taoba hopta tatemlen Nottingham Forest den asayadang assists nung otsü yanglua 20 buba maongka agüja liasü. Pa ya Thierry Henry aser Kevin De Bruyne den sako assists 20 buba nung lir aser asaya ka anünga lir.

Pai asaya 37 nung goal ti agüja Premier League nung Manchester United jenjang asem buba tongteta Champions League atema qualify süogo.

Premier League tan season nung Fernandes-i chances 132 yanglutsüba ama asayar katia yangluteta mali. Tajungtiba jenjang tanabuba nung alias Liverpool nungi Dominik Szoboszlai dang 43 ben agi pa timba lir.

United nungi 2011 küm defender Nemanja Vidic-i iba



Bruno Fernandes

sempet anguba sülenbo Fernandes ya mezüngbuba alitsü.

Panel of football experts nungi aser nüburtemi votes agütsüba meyokteper iba sempet asoshi asayar shimer.

Iba sempet atema Arsenal nungi David Raya, Gabriel aser Declan Rice, Manchester City nungi Erling Haaland aser Antoine Semenyo, Brentford nungi Igor Thiago aser Nottingham Forest nungi Morgan Gibbs-White nungertem shortlist süa liasü.

United pur iba season tatembangba asaya Deobarnü Brighton nung asayatsü.

BILEMDANGANG

"Tanü nai kechi inyaker, ibaji ajanga asüng ser aoba nung na yaritsü."